

四庫全書

集部

欽定四庫全書

集部

大雅集卷一至三

詳校官中書臣丁崇祚

助教臣常循覆勘

總校官知縣臣楊懋珩

校對官助教臣卜維吉

謄錄監生臣張同履

欽定四庫全書

集部八

大雅集

總集類

提要

臣等謹案大雅集八卷元賴良編良字善卿
天台人是集皆錄元末之詩分古體四卷近
體四卷前有至正辛丑楊維禎序又有至正
壬寅錢鶴序末有王逢序不署年月維禎序
稱其所採皆吳越人之隱而不傳者序末良

自識云良選詩至二千餘首鐵厓先生所留者僅存三百鐵厓道人即維禎別號是茲集乃良所裒輯而維禎所刪定故每卷前署維禎評點字也然觀集中止首卷前數篇有維禎評語七言律詩中顧瑛和維禎唐宮詞十首亦列評語於其下餘無維禎一語或傳寫不完或但經維禎點定中間偶評數首良重其名遂以評點歸維禎歟顧嗣立選元詩三百

家衆作略備然大抵有集者登選雖稱零篇
佚什各入彙集而彙集實闕而未輯此集所
錄多嗣立之所未收其去取亦頗精審蓋維
楨工於篇什故鑒別終為不苟又每人之下
皆略註字號里貫元末詩人無集行世者亦
頗賴以考見固不失為善本矣乾隆四十六
年十二月恭校上

總纂官臣紀昀臣陸錫熊臣孫士毅

總校官 臣陸費墀

大雅集原叙

客有賴良氏來謁余七者寮致其請曰昔山谷老人在
戎州歎曰安得一奇士有力者盡刻杜公東西川及夔
州詩使大雅之音復盈三巴之耳有楊生素者任之刻
石作堂因以大雅名之先生鐵雅雖已徧傳海內而兵
變後諸作人未識者有之請其詩付有力者刻之亦使
大雅之音盈於三吳之耳不亦可乎余曰東南詩人隱
而未白者不少也吾詩不必傳請傳隱而未白者於是

去游吳越間採諸詩於未傳者得凡若干人詩凡若干
首將梓以行來徵集名吁良亦奇士哉偉其志而為之
出力以鋟者則淞士夫謝履齋氏余因以山谷語名之
曰大雅集蓋良以待我而我以待諸公庶入是集者皆
可以續杜之後而或有嫌焉者不入也良曰然書諸集
為叙至正辛丑立秋日丙午鐵雅道人楊維禎書

昭明文選初集至一千餘卷後去取不能十一今所存
者三十卷耳三十卷中尚有可汰者選之難精也如此

良選詩至二千餘首鐵雅先生所留者僅存三百古人
以詩名世或一聯一句不為少也而有擅場雄作則大
篇長什又不厭其多也故今所刊者或一人一詩或一
人數十詩蓋不以多寡較也天台賴良白

大雅集原序

古者天子巡守命太師陳詩以觀民風蓋將以探民生之休戚以知王政之得失此周人所以不能已於采詩之官也欲觀民風而必采詩以陳者民之情因言以宣猶物因風之動以有聲也則詩者志之所存情之所感而言之所從以出者乎但上之化下也有淑慝之分則下之報上也有美刺之別然發乎情止乎禮義樂而不淫哀而不傷雖刺也主文而譎諫言之者無罪聞之者足

以戒此詩人忠厚之至也然則周人所以采之者不以其出於情之真乎由是知古之人以情為詩而其言莫不麗以則後之人則以詩為情而言不出於情有矣况麗而有不則者哉古之詩多於民之心後之詩多出士之筆雅頌之作固能之而風或不之及蓋心匪鬱伊而寫其幽思者非情之真也惟中心感發者然後足以吟詠其性情耳故後世雖有采詩者實難其人焉然有慷慨以鼓其氣磊落以驅其才若杜少陵輩則不能無

風雅之作耳若此者雖微采詩之官識者能采之矣
天台賴先生善卿以三十年之勞不憚駕風濤犯雨雪
冒炎暑以采江南北詩人之詩其采也公矣情深而不
詭則采之義直而不回則采之體約而不蕪則采之詞
麗而不淫則采之而未始有不關於世教者吁亦勤矣
哉非其學博而守約得詩人之真趣者不能造斯域也
會稽楊鐵厓先生批評而序之命篇曰大雅集而友人
盧仲莊氏手為之鏤梓既版行學者莫不購之以為軌

式焉它日有采詩之官者出其必將采卿之所采以進
於上矣於是乎序時至正壬寅春吳興錢鼎在雲間之
水南山北寫

欽定四庫全書

大雅集卷一

元 賴良 編

李孝光

字季和號五峯永嘉人

箕山操和鐵雅先生首唱

箕之陽兮其木蓁蓁箕之冢兮白雲悠悠彼世之人兮孰能遺我以憂雖欲從我兮其路無由朝有人兮來飲

其牛

評曰善作琴操然後能作古樂府和余操者李季和為最其次夏大志也附鐵雅先生首唱曰箕之

山兮可耕而樵，叶箕之水兮可飲而游。牽牛何來兮，飲
吾上流，彼以天下讓兮，我以之逃。叶世豈无堯兮，應堯
之求，吾與堯友兮，不與堯憂。

題太乙蓮舟圖

銀河跨西海，秋至天為白。一片玉芙蓉，洗出明月魄。太
乙真人挾兩龍，脫巾大笑眠其中。鳳麟洲西與天通，扶
桑迺在碧海東。手把綠雲有兩童，掣鬚二鳥開金籠。評

此作又是李騎鯨也，孰謂此老
惟鈍无爽氣耶？二鳥作日月看。

項炯 字可立，天台人。

公莫舞

龍蟠錦帳金奕奕虎旗無際人馬立肉林垂益陵阜赤
萬甕行酒晴虹濕大蛇中斷狂魄滅重瞳無光射寶玦
雷憤風愁三尺鐵河山未必如瓜裂老荒捩珥語公莫

頭上青天懸日月

評曰錦囊子有
奇語無此奇氣

吳宮怨

繡楣洒黃粉椒壁漲紅青倚簷樹如鬼深草蛇夜鳴

髀已無淚古恨埋石局

評曰十字慘過牛鬼
髀無淚尤勝無語

夏溥

字大志號虎怕道人淳安人

鴻門歌

大風揚兮赤雲屯楚人望氣皆龍文當時吾甚笑亞父
幸至彭城疽背死誰云沐猴竟遭烹汝乃盛怒喚孺子
嗟哉拔山之力不可得扶義而西取天下者以三尺君
看項王重瞳舜重瞳天命迺在隆準公

吳山謠和鐵雅先生首唱

中興過江笑諸人二十三表哀老臣倡和國事可斬檜

馬上青衣竟何在采石未靖瓜洲驚戰功今迺歸儒生

第一峯前誰立馬夜箭射血來帳下

評曰二作不用二李別有一種史斷

附鐵雅先生首唱曰中原四日一日東東山草木無金風艮精重起大小岳此是趙家天柱峯天柱裂地紐缺老檜

陸居仁

字宅之號雲松野褐雲間人

楚人弓

楚人弓懸兩石五十萬矢陷強敵絳人弓箭三隻長歌

入關成偉績多箭不如少箭力制敵若在弓矢間鳴條

牧野高於山

評曰史斷入詩歲警多矣

國馬足

國馬足吉行五十轡如沃天馬足一日千里更神速國

馬天閑飽芻粟太行鹽車天馬哭

評曰自託可悲句短而意無窮

陳樵

字君采著書曰鹿皮子東陽人

夜闌曲

碧宇星回夜漫漫靈蕪烟煖重薰薦冷翠香銷青桂枝
冰荷葢光光遶帷花樓豔舞金姜鞋吳羹蜀酒精瓊糜

酒闌半解龍綃衣春朝曲渚聞鷓鴣

七夕詞

內人拜月金鋪戶鳳宿梧枝秋葉下露華入袂玉階寒
織署錦工催祭杼月下金鈿照骨明同心絲繪紅生縷
素瓜碧實上繒樓夜闌飈馭下銀州

瑤臺月

銀漢西流烏接翼回首人間化為碧瑤臺月裏可避胡
三郎錯路歸魚鳧霓裳月裏親偷得又怪李謩偷摩笛

海人謠

海南蠻奴髮垂耳朝朝採寶丹涯裏夜光盈尺出飛魚
柏葉收珠寒蕊蕊幽箔連錢生綠花切玉蠻刀如切水
九譯來朝萬里天北風不動琅玕死

出塞曲

為戍潼關李總管賦

屬鏤夜啼光屬地將軍一出撓槍死行塵不動人歸市
帶甲如雲自天至取君甲兵為君洗分明袖有銀河水
手中遺下泥一丸不封函谷封泰山

雁來紅

東朝一書成百戰上林一書旌節返又傳驕子一函書
人不如禽解邊難自從燕滅秦晉亡是非直到空中雁
蘇郎寒絕雁來紅腳下胡姬殘綵線願燕在北秦在西
雁去雁來無是非

長安有狹斜行

長安出狹斜方駕秦中客去是牛丞相來自薄家宅薄
家萬戶侯朱門映椒壁長秋車馬來賓客御瑤席金屋

貯尹邢阿嬌淚霑臆燕燕慵來粧繁華照春色轉蕙光
風翻趙帶徘徊月到班姬牀班姬輟芳翰紈扇從風揚
明妃鬪百草玉環御雲裝向來溫柔地盡入白雲鄉何
以慰王孫琵琶隨驢驢何以奉燕燕罷舞歌慨慷何以
奉明妃綠珠奏清商嫫母挾無鹽搔頭愛宮粧

評曰襲
格不襲

語善學小李者歷來
紅狹斜行匠意尤遠

張天雨

字伯雨號句曲外史錢唐人

玉笙謠為鐵門笙伶周奇賦

我有紫霞想愛聞白玉笙縣匏比竹無靈氣昆丘採此
十二莖鳳唳明珠鳳翼排素翎金華周郎妙宮徵子
晉仙人初教成月下吹參差群雛亦和鳴緱氏山頭白
雲起七月七日來相迎長謝時人一揮手漂下滿空鸞

鶴聲

評曰甚
似太白

延陵公承慶堂詩

大江蒼方元龍虎輔元之家百神祐望拜受釐若稽古
上清真人閱衆輔新宮潔齋導天語紛雲郁霞錯承宇

虛皇穆然陽衛武左颺右歛降軫羽縣鐘鏜鏜迅擊鼓
赤金祭服赭朱戶雙珠月明帶寶璐挾以流黃玉櫺具
既竣大禮私事舉吉日宗族奉爵俎青紫系地簪綬組
魏張代劒新捧土饒國開觀治宿莽報君親師物咸覩
撫己一念或未溥西壁考書玄範府寒冰層陰發春煦
日幽若明沐仁雨道德大非方仙伍月佩六印非適取
持旌召趣迹旁午下土滓壺寧久處天闕會規足蹈矩
願天願地多稔黍畢忠萬年奉明主小史作詩孰敢侮

吁嗟厚德番之祖

評曰不蹈黃庭句意森滿

天池石壁為鐵雅賦

倪璿畫

嘗讀枕中記華山閼中吳神泉發其顛青壁繚其隅春
風四山來群綠互紛扶羽觴曲折行浮花與之俱採珠
璣薜荔洗玉弄芙蓉聲叟頗好名石窪作魚湖鴻乙志
草堂挑烟遂成圖而此滌煩磯閱世如擣蒲發興雲林
子盟手與我募居然縮地法挈入壺公壺

悼薛玄卿

玄卿難再得本是餐霞人高懷獨超物洞鑒亦絕倫君
自江東我吳下早歲聯翩侍金馬御榻賜書凡一束仙
苑偷桃動盈把紫虛元君之玉訣青城先生教我者感
君多道氣探懷為君寫學士承旨平原公許我與君楊
許同一時標名兩外史羽衣白茅立下風我還句曲甘
餘載君乘輜軒歷烟海歸錦橋西結草樓樓下袂被長
相待風烟山水共追尋福臨洞口話離心年深書字化
為碧白首蒼茫成古今聖井山崩數千尺君從羣龍去

無迹困頓鹽車篠領頭此日思君復何益

奔月卮歌答鐵雅所作

甕社明珠奔入月脫殼政似風蟬潔漁網出之不敢視
滌盡寒沙光不滅文昌四星吞在腹一一金晶大如菽
蜃物還來作飲器日夜雄虹繞茅屋一扇桃核寬有餘
半葉蕉心卷未舒飲非其人躍如水怪雨盲風生座隅
置之天上白玉盤斗柄挹酒長闌干李白跳下鯨魚背
持勸我飲相交懽幽宮馮夷為予泣酌盡海水百怪出

還我平生老蚌胎許君醉臥蛟人室

王逢

字原吉號蓆帽山人江陰人

婦董行

婦董滕人鎰進妻也與兄順並以勇稱金季山東亂
天兵駐嶧山進單騎覘之中流矢死順徙家淮南舉
室溺淮水董為呂安撫裨將所獲

北軍南軍和議時兩起對立龍鸞旗星辰錯亂風雲氣
乾坤造就冰雪姿渾家性命葬魚腹一舸涕淚隨鷗夷

長眠自足為義鬼後死只望金孤兒兒在腹中兵在目
憶夫心頭臂消肉岱宗誰鏤白玉牒汴州衆撼黃金屋
太尉遙歸明主死安撫猶存寡妻宿羞看人面問消息
強通語笑寬羈束伯順見義勇著鞭銳士裹足鋒爭先
道傍弩伏荆棘底掌上珠還江海邊將門有後傳世世
墓祭無所從年年中原山河想如故目斷一點滕州烟

銀瓶小娘辭

宋岳鄂王之女聞王被收負銀瓶投井死

碧梧月落烏號霜寒泉幽凝金井牀綺疏光流大星白
夢驚萬里長城亡女郎報父收囹圄將身贖無所
官家聖明如漢主妾心媿死緹縈女并臨交衢下通海
海枯衢遷井不改銀瓶同沈意有在萬歲千秋露神彩
魂今歸來風脩然趙陵無樹容啼鵲阿爹墓木西湖邊

留睿

字若愚括蒼人

思親行寄弟子通

今年八月來作客出門倏忽日已百自從二十走湖海

零落天涯幾岑寂幾岑寂重悲嘆親在高堂望子還子
在長途衣亦單准擬明年作官食君祿歸來共汝舞袖
紅編欄天目之山去天不盈尺使我登之徘徊望鄉國
吁嗟胡不生羽翼吁嗟胡不生羽翼

寄遠

征夫往幽燕賤妾住吳越參商二十載綠髻生華髮年
年望飛鴻目斷愁不歇秋盡冬復春葉落花更發恨君
顧妾身不如天上月月行幾萬里東出復西沒又東出

金瓶梅
卷一
夜光夜光頻照妾妾容謾比花君情遽如葉念欲走從
君河廣詎可涉燕趙多美人顏色皎如雪所樂在新知
誰復念離別雪性本飄蕩雪質易虧缺何如賤妾心不
轉堅似鐵君看望夫石千載名不滅

代遠人答

憶昔發江南與君生別離臨當上馬時屬君兩男兒幼
兒在襁抱長兒能歌詩功名豈可必三載以為期君時
聞我言感頰雙蛾眉一去數千里各在天一涯塞北望

江南憶君君不知目送南征鴻遠寄長相思相思心不
絕綿綿如藕絲蹉跎二十秋日月互推移三載約會而
斯言遂成欺前年離燕山遠行到月氏途中天雨雪寒
風裂我肌六月陰山道猶復衣羊皮馬上多胡姬顏色
如燕脂為君不忍覷君何自狐疑雕鞍駕朱輪行當似
蘇秦千金會舊友椎牛會衆親莫學會稽婦容易輕買
臣

袁藏用

字顯仁古汴人

春雨歎

天陰陰晝多雨輕薄陌頭花無數成塵土明朝蕭颯陰
風寒祇恐摧折青琅玕山中嫩人看相倚淚濕翠袖時
難乾

袁舉

字仲微江陰人號浮游生

乙巳寒食

香風吹面東方來櫻桃花發柳眼開鸞簫聲歇幽蘭笑
十二樓前青爵叫王母騎龍愁暮雲碧桃過眼三千春

北山佳城久無主寒食心摧淚如雨自驚髮薄不勝梳
心事波搖為誰語

舟過三江口

吳淞合流三百里一幅蒲帆掛春水青山繞船黃鳥啼
盤迴如在巴渝裏沙上游龍滴血紅風吹老魚浪花起
凝雲不流神嫗哭萬古胥魂招不復客浩歌誰相續棲
遲零落漸離筑思家何處問迷津鷓鴣聲裏垂楊綠

大雅集卷一

欽定四庫全書

大雅集卷二

元 賴良 編

孫華 字元實 華亭人

池中白蓮

蕊宮夜涼張暑宴仙姝散花水精殿霞綃中單雲錦緣
黃金為房玉為鈿翠旌導前寶蓋殿霓裳中序按未過
一人素衣持羽扇頎然中立白玉弁羣姝被酒酡發面

金史四八卷二
冠珮傾然醉相盼彼我弁者色不變以口承露不肯嚙
終然貞白難自薦獨向西風抱清怨

錢惟善

字思復號曲江居士錢唐人

折楊柳

何處好楊柳攀條送遠行花飛渡江水客醉踏歌聲秋
色悽榆塞春陰接鳳城一株不敢折為近亞夫營

洛陽陌

驅車洛陽陌周道何遼遲玉帛走侯甸金湯固城池潘

令好桃李阮生多路岐銅駝臥荆棘索靖獨先知

錙堪

字子輿嘉禾人

擬古

千金買明珠百寶裝帶鉤寶帶綰同心明珠垂兩頭美人結新歡託體相綢繆再拜稱主壽持以奉千秋

鄭基

字本初三山人

白苧詞送謝叔久

征鴻至征旆舉花發芙蓉滿江渚吳姬約雲歌白苧凝

為朝雲向君舞牽絲鳴玉張宴遲稱觴聽曲心自怡君
之別會有期

王逢

字原吉號蓆帽山人江陰人

費夫人

夫人姓費氏諱元琇江陰州知事朱道存妻也

青蘋花白蒲水黃雲日黯慘風悲涼停轡西向三酌觴
旂旌葆幢來混茫若有人兮凜如霜星流電馳惟可望
微言夙習大洞章功成拔宅居帝鄉鵲河蟾窟肆翱翔

笑援北斗挹酒漿帝曰欽哉無太康下為濁世扶綱常
進規退矩禮自防釵荆裙布即孟光尊姑養之植德堂
朱氏堂階珠樹聯瑤芳明璫蒼佩森琳琅搥鐘考鼓樂
未央楚氛遮天耀天狼飄然歸寧父母傍正坐漆室憂葵
傷官兵寇我加劒鎡昊天倚杵海變桑身有濺血無回
腸稽首再拜淚雨滂驟焉直上駭鸞皇

趙氏二女辭

女山陰游鯉山人至正十二年冬寇至懼辱投溪水

中死之

遊鯉山石高屏顏游鯉溪水清洄灣中有我我青髻鬟
望如春雲不可攀壬辰仲冬寇蜂起乳臭將軍先披靡
民人顛連社稷圯我固當為貞白鬼後來小妹復被驅
亦葬魚腹全其軀山高水清幾千載虹月夜貫摩尼珠
夜深鮫宮屏機杼風吹草寒髑髏語何由生長江沱間
及見王睢鼓雙羽願回堯天行化日女子有家男有室
地下甘心燈似漆

鄧梓

字文若江西人

錦雉圖歌

錦衣繡翼何揚揚
棠梨花開春雨香
雌雄並立羽未翔
咫尺或是山之梁
林深枳棘如人長
摩挲竹枝思鳳凰

徐士榮

字仁則號五雲先生章安人

新街曲

東街南曲聲婉揚
西街北曲聲激昂
佳人唱曲不下樓
樓下白馬青絲韁
昨日開筵擊鼙鼓
今夜合席調絲簧

樂聲亦似曲聲雜人意豈如物意長祇恐樓上人春光
不長好寧知馬上郎金壁非重寶向來恩愛江水深一
旦殘花與衰草

李復

字道原號荊莊老人寧海人

弔烈

烈婦身可戮烈婦之身不可辱十年夫壻從遠征夜夜
青燈伴幽獨豈期淪落兵戈林長檣列戟森如竹將軍
手刃秋霜肅烈婦怒視不轉目分甘一死無生還烈火

何曾燬真玉妾心匪石不可轉妾心匪席不可卷捐軀
念欲赴江流回首不堪江水遠誓將貞白歸黃泉焉肯
偷生求苟免若將顏色事他人為誰終身懷媿靦貞魂
願逐劒光飛妾今視死猶如歸人生天地誰無死一死
日月爭光輝我哀烈婦歌此曲萬古清風動澆俗烈婦
絕勝烈丈夫丈夫臨難猶畏縮懼死多忘食君祿回想
烈婦徒慙慙

周之翰

字中甫雲間人

送馬秋野千戶出征淮西

霜原晶晶秋草衰西風獵獵吹大旗酒酣仰天數過雁
落日滿地青山低時艱不作昇平夢半夜困龍匣中動
此行乘雪蔡州平書生擬獻平淮頌

阮拱辰

天台人

白露雨

并引

至正己亥夏大旱至八月六日天氣鬱蒸雲勃怒起
衆謂是日為白露節是日雨苗秀且不實言已震雷

雨降民相顧怨咨若不能生者噫世之顛連困苦冀以求活於人者安知其非白露雨也作白露篇以訟

雨師

白露雨民無辜小民憂旱顓且呼三月望汝眼欲枯汝來今日何為乎不為我祥復為我殃害我田穉甚於螟蝗嗟爾雨師兮罪不可量上天憫下兮仁德孔彰願挾汝兮訴帝傍汝首剗汝腸祈豐年若雨暘坐見赤子歌樂康嗟爾雨師雖死兮其誰汝傷

雷擊蛇并序

至正辛丑夏予自瓢湖南放舟絕湖口而北時雲日
晝晦天西北有龍蜿蜒下垂雷怒若擊物狀舟人曰
是龍下取水雨且暴至乃泊舟別潏見有蛇當傍近
地長可十尺許俯首不敢動舟人迫而視之蛇且死
矣予竊意是蛇乘間出草莽間搖尾肆毒使不遇真
龍在天則為害有不勝言者雷之擊蛇者有以哉因
喜而賦曰

維龍其神為雨為雲以利我耕耘以育我下民彼蛇弗
仁雷其震

彼蟲之毒維蛇維蝮以嚙我草木以傾我陵谷維龍弗
伏蛇弗育

張樞

字夢辰陳留人

將軍歌

將軍走馬沙草場
擐龍蹀躞鷹飛揚
狡兔之窟四顧無
所藏
置罘如雲箭如雨
滿眼禍機寧脫此
將軍一日歡

豈直百兔死君不見李斯非相才上蔡東門游獵子

釋善繼

字繩宗會稽人

大雪行

冬十二月歲庚午江南雪深一丈許衾裯斗粟何處尋
凍臥饑泯不開戶妻啼兒號面西東天高聽卑欲誰訴
去年一極旱火赤今年一極大雨注官倉私廩例空虛
蒼生何以守環堵西北風塵未盡消當道豺狼又含怒
明年宿麥縱連雲揮涕無從扣箕禹憑誰寄語東諸侯

恤民有道無輕舉君不見曩時桑大夫慘刻祇取身滅
誅又不見只今曹黃須擢髮數罪憐渠愚

釋必才

字大用天台人

即事二首

負郭有田多不種種熟軍收要民送明年誰復事犂鋤
卒歲渾家受飢凍忍飢受凍可奈何直須檢刮焚其窠
去學短衣帶刀箭倒刮他家養良賤

泗州倉廩飢雀鼠官有舟車難運取蠅屯螳慕急要糧

巨室大寺遭鞭撻捧土懸知難塞河檢家掠路傷民多
分兵兼程走其下就倉食粟如之何

無題二首

飢虎狂咆奔城市急走閉門驚未已有人直欲捫其矛
斃之視若刑犬耳如此英雄世豈無位沈下僚困屠沽
諸方噬人足狼虎袖手待殪將安圖

西家酒美門犬惡東家犬馴酒味薄遣沽就飲多在東
積錢難用翻愁索憑誰斃却西家犬兩廬吹香過客便

不愁東槽風雨乾到門自挈空瓶轉

沈存

字可堂雲間人

懷友人俞伯貞

去年秋風捲黃埃美人躍馬沙邊來今年秋雨洒白日
美人遠上黃金臺黃金臺下燕山道漠漠寒雲接衰草
雁飛不斷青天長長使征人路傍老美人美人胡不歸
清霜凋盡珊瑚枝臨風三嘆思欲絕悲莫悲兮生離別

盧昇

字廷舉高唐人

啄木吟

啄木啄木穿林簌簌汝非攫肉又不啄粟何獨蠹蟲便
爾欲樹枯不復榮蠹死還再生汝能食蠹不再生我奏
天子褒汝繡衣使者之嘉名免使蠹木為薪蒸

新嫁娘

新婦調羹湯小姑繡衣裳新婦不停手小姑不下牀新
婦語小姑爾亦不自量爾年二八餘寧久阿母傍請看
繡針底文彩雙鴛鴦春風一朝起持贈畫眉郎爾姑別

我去如我事姑璋

范立

字叔中錢唐人

遠遊篇

仙人手把金芙蓉邀我上陟蓮花峰
兩眼注入滄溟東浮雲遮斷扶桑宮
白日西飛恐成晚架天五色橫長虹
鳳凰儀羽備玲彩欲集不集無梧桐
冥冥杳杳脫羅網亦有數點南飛鴻
怒鯨崔嵬鼓鱗鬣浪中瑣屑多沙蟲
從今喚起人中龍披虎豹謁九重
舞干羽息武功泰和

世上皆春風是時勒名留鼎鍾左招黃綺右赤松長歌
歸去來山中長歌歸去來山中

賦三色梅花

姑射肌膚白於雪夜出瑤臺看明月羅浮仙人醉臉丹
笑跨彩鸞下銀闕相逢同過金母家金母小玉名陵華
一色羅衫染蜜褐仍帶絲囊盛紫霞珊瑚鉤起真珠箔
玉笛吹殘風色惡羣仙齊怨老容華斑斑淚向鮫綃落
月夜調琴有作

橫琴獨坐花間月
天地冰壺夜清徹
鳳凰栖老碧琅玕
蹋碎瓊瑤六花雪
斯須化作蒼龍吟
風生太華秋陰陰
有美人兮隔雲漢
調高奈我相思心

瞿智

字惠夫崑山人

從軍行二首

年少去從軍
妻兒生死分
弓開孤月影
劍動七星文
解識風雲氣
能穿虎豹群
不將身許國
何以樹功勛
破敵三營外
城頭日欲低
舉烽連磧遠
戰氣接雲齊
旌

幟驚鳥起鏡筩雜馬嘶祇愁千里月少婦正悲啼

徐孝基

字立本章安人

見羣龍歌

辛丑夏至日賦

玄黑崔嵬半空黑大龍蜿蜒小龍直天瓢倒瀉銀河懸
海氣空濛海波立須臾復有三四龍威稜氣勢如羣雄
雷公擊鼓玉女笑飛烟烈焰飄長風維時一陰凝下土
六龍在天啓坤戶陽剛奮發無停機久旱終當沛甘雨
我方扁舟湖上行見之頓覺雙眼明茫茫真宰不可詰

乃知神物能通靈君不見葉公好龍妙圖畫一朝忽有
真龍下可憐辟易走且驚不識真龍足悲咤

大雅集卷二

欽定四庫全書

大雅集卷三

元 賴良 編

陸居仁

古意二首

采蓮多芳草種豆襟艾蒿馬齒似蕙根魚腸溷鉛刀舉
世方好竽錦瑟將誰操已矣屠龍技終身徒自勞

王孫玉抵鵲公子金抵蛙夜光投暗室聒耳困鹽車燕

石錦十襲楚璞刑再加哲哉待賈翁懷寶無歎嗟

李坦之

李太白酒樓歌

溧陽酒樓春水涯白也繫馬樓東家千金醉盡不復惜
猶吹玉笛引吳娃日斜樓外春風起春愁滿眼楊花裏
高歌一曲下樓去傳遍江南數千里錦袍綠水迷蹤跡
落日空梁照顏色江頭盡日不見人樓上幾年無此客
倚欄仰看西飛雲如何不飲憂其身只今寂寞千載後

誰酌采石江邊墳

山中苦寒歌

深山苦寒不可居
門前積雪三尺餘
陰崖一夜石蛻骨
寒溜萬瓦冰垂鬚
道人凍臥山之麓
莫藝松明煮溪綠
山陰孤棹期不來
夢入幽岩聞折竹
征西將軍持短兵
馳馬夜渡黃河冰
關東諸將面欲裂
嚴光獨釣桐江雪

悲戰士歌

吾聞上古無為天下治
兵車首自軒轅氏
湯武爭王起

征伐秦併山東乃稱帝亂世英雄力排主四海生靈血
塗地中原落木風颭颭一度興亡一度秋乾坤百戰日
月黑秦華不動黃河流玉關旌旗拂太白王師萬里開
絕域春風草綠師未還鐵箭飛書問消息功名不願萬
戶侯富貴不願千金裘但願朝廷有道烽燧息結屋深
山看青壁

李哲

字公穀號耕雲前進士

韓之盧

韓之盧猛捷世所無利口疾足逢時需蔡以糠粃飼以
餘感激意氣心力輸平原八月秋草枯呼嗾詭遇當前
驅東郭之斃衣褐徒食邑卽地承其初爾祖于戍封時
俱不侵不暴穴以居爾窮其蹄禽焉俘盡室累累恣所
屠逞心得雋名欲沽北山有猓踰南山有於菟大為民
害爾勿除磨牙食人肉白骨委道途大為民害爾勿除
聞其腥臊安尾逋觸邪既無獬豸德仁厚又不慕騶虞
畏強凌弱心何如上天好生爾好殺逆天罔道天必誅

一朝惡積殘其軀形骸狼藉磔路隅傍人不恤掩鼻趨
有孀其雌哭呱呱百獸率舞蹢躅呼

孫華

宇文子貞至驛為松江諸邑田糧事賦古詩二章
贈之

朝行谷水東暮行谷水西谷水日日流驛舟日日來驛
舟來不已波浪日日起

朝行谷水西暮行谷水東傍人指驛舟舟中有春風春

風吹谷水照見桃與李

商人婦

妾年將今笄嫁與東家兒東家兒販江西夫婦五年三
別離江西娼家花滿蹊不知今年歸不歸春來還為作
春衣滿院楊花雙燕飛

楊基

字孟載蜀人

黃鶴生歌

君不聞眉山道士徐佐卿化為黃鶴朝太清還君金僕

姑留得千載名又不聞穹隆小仙徐子貞翩翩自稱黃
鶴生鍊形蓬萊山鳳臆紫燕膺千有六百年飛上白玉
京玉京錦貝闕十二樓五城娟娟萬青娥吹笙來相迎
黃鶴生骨相奇金衣玄霜裙纖指而洪髀不飲華池漿
不啄青田芝恥彼五色鳥覽德輝下之浮丘不能招八
公不敢騎飄然從西來不使上帝知帝遣紫虛玄君魏
夫人夜乘白鸞來相追琅霄頃刻九萬里追之不及鸞
聲悲黃鶴生請少留爾為黃鶴舞我為黃鶴謳便須吹

玉簫登爾黃鶴樓樓高幾百尺見三島十洲瓊珠金光
草鐵網珊瑚鈎樓今已搥碎瓦礫三千秋黃鶴生孰與
儔母乘腰纏人扶搖上揚州揚州瓊花已枯死仙人不
復來追遊黃鶴生鉗爾口母銜紫泥書寄與西王母王
母見爾笑起作小垂手黃鶴生來爾聽崑崙十二峯朶
朶芙蓉青上有雙羽箭金鏃孔翠翎為我取之來射此
天狼星坐令談笑間四海烟塵清爾亦策爾勲我為爾
勒銘更呼薛少保圖爾雲臺形黃鶴不肯顧長鳴掉頭

去路逢鐵龍君疊疊道其故龍君勸不止竟觸龍君怒
手挽黃鶴衣醉叱黃鶴住黃鶴不敢去飛遶三華樹夜
深鐵龍睡不醒黃鶴高飛不知處

董佐才

題考功掾金華范景淳風木圖

金華范氏忠孝門天道福善生賢孫苦云父母壽不永
三復伊蒿如事存結廬墓門秋復春悲風拱木偏愁人
弱枝凌空根入土根猶父母枝猶身木雖欲靜風不止

子雖欲養親不俟由來大孝慕終身聖稱虞舜賢曾子
去年辟試銓曹吏回首鄉關二千里畫得墓間風木圖
比作座銘懸旅邸風吹宛似聲號呼木身半著涕淚枯
目之所至思所起百歲一日心無殊召公甘棠武侯柏
惠澤在人人尚惜晚節移忠顯令名報取劬勞恩罔極
方寸鐵為盧仲章賦

方寸鐵百鍊剛吹毛劒鋒秋水光鐫勒妙擬邵竹房倒
薤文連環鈕通侯累累懸肘後伏龜趺蟠螭首頌德紀

功垂不朽鐵名已著霜滿顙復得鐵業傳二雛勿創元
祐黨勿刻諗癡符何如往補石經缺萬古六書存楷模
天下英髦知所趨伊誰之力丹丘盧

董紀

字良史

短歌行

山鳥日日喚提壺勸君酒盡須更沽千金五花不足惜
莫計囊中錢有無人生百歲幾時好大是愁多歡樂少
朝見開花暮落花昨日朱顏今日老為君起舞為君歌

當年不樂奈老何

紀夢

夢中挾飛仙與我肩相齊手持綠玉杖脚踏青雲梯彈
指天門開天家難久稽培塿視三山九州一丸泥蓬萊
自清淺海水忽流西金雞半夜出又向扶桑啼

張樞

字夢辰

生日自責三十韻

西有濯錦江東有自滾湯南有樹頭酒北有地種羊我

生四維中曾無一線長仁獸乃騶虞瑞鳥為鳳凰帝江
解音律火鳥識興亡老我嗜書史疊疊空文章聖德不
暖席賢知亦賣漿飯牛百里奚誣金同舍郎我何專一
隅跬步費籌量緹縈小女子有策陳未央姬滿甫髻鬢
對言如珪璋退耕力不任進升心未遑我髮日種種我
生日茫茫頽然六十翁宇宙須眉蒼一子峭孤立力穡
不救荒三弟各奮飛食祿天一方今年耳重聽兩眼無
童光長笑却秦兵大哭救楚王少不同鷄薦老無事鷹

揚今日屈初度妻子具壺觴坐我方惻然置身桃李傍
肴核雜前陳旨酒弗願嘗聽我心中辭援琴彈慨慷父
母生我時艱險且徬徨三日不蓐食俾整棺衣裳皇天
與后土覆載德汪洋展墓渺何許望望白雲鄉惟有罔
極恩九死不足償妻兒悉我意嗒然摧肝腸請從事斯
語沒身不可忘

高啓

字季迪平江人

明妃曲

都門塵拂春風面
臨別看花淚如霰
君王惆悵惜蛾眉
不似前時畫中見
白髮呼韓感漢恩
寧胡漫號關支尊
羶裘肉食本異俗
不如但嫁巫山村
黃沙漠漠無城闕
指冷鴟絃夜彈歇
相隨萬里到穹廬
只有長門舊時月
妾語還憑歸使傳
妾身永棄不須憐
願君勿殺毛延壽
留畫商巖夢裏賢

秋江曲送顧倅之江北

秋江月滿秋潮大
江上行人待潮過
別離休說渡江難

半日順風船穩坐楚鄉茫茫葭蕀平使君來時雄雉鳴
子弟從軍渡江去幾家猶住夕陽城水田雖荒飲常足
芡米夜舂三十斛誰道繁華不及前戶無征稅官無獄
渡江渡江君莫留江北樂似江南秋

劉原俊

字用章浚儀人

過歌風臺

六國無人祖龍死布衣提劍山東起八年置酒未央宮
千載猶思復田里風飛雷厲來咸陽錦衣其如歸故鄉

登臺作歌醉眼白俯視四海諸侯王寂寞河邊一丘土
烟樹蒼茫接齊魯行人何必重傷心世事回頭今亦古

安將軍歌

安將軍紫髯鐵面多戰勲猛氣散作西山雲前年紅巾
入城府赤子滿城誰父母將軍血戰城東門五百健兒
齊奮武更有大郎猛於虎身屬橐鞬寶刀舞打馬奪橋
入賊塢殺賊盡作河邊土將軍父子真有功今日渾如
畫筆空將軍功豈不好弁山入雲青不了

朱堂

字官堂

聾婢辭

山翁有老婢凶歲家窮罄十千質之歸用以司晨炊醜
惡固不論病瞶殊非宜指揮失西東百喚不一知主母
大叫呶焉用痴婢為回頭謝母翁聽婢前致辭婢也病
不聰婢也誠非痴世情惡察察偏聽生姦欺郝生入幕
賓臥吐王允之紛紛墻壁間屬耳干人私殷牀驚蜺鬪
渡水笑狐疑作勞暮夜鳴鼙續左右規凡此非婢病婢

病良可醫奔趨及語言所恨見事遲口目且順從手足
可運持幸毋怵迫驅假以寬緩期猶堪脩掃或可貸
鞭笞況在蒙莊書亦聞老聃師五音令耳聾六鑿使性
移不痴亦不聾聚室能無疵有耳未足喜無耳未足悲
此疾何足卹此理端可推翁母聞婢言失笑幾解頤勿
輕聾婢痴更謂聾婢奇明年社日來乞酒為爾治

萬權

字仲衡

兄入甕

來俊臣與周興對食問因不服當何如宜置炭熾甕
人居其中無不服者俊臣出內狀曰請兄入甕

炭山高赤如血炙天天欲然燎地地欲裂火鳴亂飛鐵
甕熱請君投箸坐甕中髀骨焦枯自為孽魑鼠捕狸鼠
技竭蛛絲羅螫蛛先滅甕中人嶺南別

母提刀

僕固懷恩謀叛不朝歸白其母母提刀遂而教之

母提刀泣且教臣當死忠子當死孝天王待汝恩不薄

食邑太寧頒紫誥兩虎爭百獸笑我欲為國除殘虢劔
爾心謝三軍斷爾頭告七廟嗚呼賊子何煩老吾老

釋仁淑

字象原

關山月

白楊風蕭蕭胡笳樓上發壯士不知還羞對關山月去
年天山歸皎皎照白骨今年交河戍明明凋華髮交河
水東流征戰無時歇斗酒皆長歌歌罷淚成血

沈理

字原禮

題蘇小小墓

歌聲引迴波舞衣散秋影斷夢別青樓千秋香骨冷青
銅鏡破雙飛鸞飢烏弔月啼鈎欄風吹碧火火不滅山
妖哭入狐狸穴西陵墓下錢唐潮潮來潮去暮復朝墓
前楊柳不堪折春風自綰同心結

釋行方 字行紀嘉定人

顧玉山草堂席上寓興

春暉樓頭春最早主人宴客情更好萬斛蒲萄瀉綠波

一色瓊璠剪芳草捲簾山色何冥冥吳天半掃蛾眉青
亂雲忽西起倒壓白日停野狐啼烟道路黑海風吹雨
蛟龍腥短歌長吁傷我情門前溪水聲泠泠

董佐才

青藜杖

應試

北斗城頭風露涼閣名天祿隣未央卯金之子校書倦
嘿思周孔參羲黃黃衣老人叩閣進青藜杖端吹火光
光如崑山燭龍照几席炯炯鬚眉蒼共談來今及往古

義理玄奧辭精詳自非神功俄頃助經籍至道淪微茫
大師靈壽謾榮寵葛陂龍竹徒荒唐豈如天上有太乙
能使人間文運昌雖云過眉尺度短扶持聖教千年長
當代人才亦豈少好著更生居玉堂

俞鎬

字孟京雲間人

擬古四首

李白一斗酒慷慨詩百篇一時縱豪放意氣凌青天
帝降輦迎天下稱其賢悠悠千載下此道非不傳

漢祖雲夢遊當時曷為意執信繫之歸封以淮陰地一
為陳稀謀功業已違志悴焉煩聖憂忠良勿宜廢

昭侯愛敝袴勿賞徒笑噸孔明誅馬謖克意在經綸一
以待有功一以示無親罰賞苟不濫大業崇千春

魏記未云久司馬懷其璽骨肉復相殘敵人遂蠶起中
有慕容氏崛然乘間起覆轍勿復蹈鑒之在青史

顧或 字孔文

塞上曲

燕山蒼蒼塞土紫雪花如沙月如水穹廬酒煖貂裘溫
匈奴角聲全部起將軍彎弓髮指冠指墮馬蝟心不寒
士卒並持蘇武節酋魁莫作李陵看

刈管

刈管種冬葵葵生管亦生再刈葵必傷置之管復榮地
力既已竭灌溉亦匪輕終焉同草莽何以慰吾情刈管
當刈根始謀在深耕

余詮

字古平撫州人

春夢軒

池青草色暖蝶曉花枝滿花滿復花稀春歸蝶亦歸蝶
歸春杳杳春夢何時曉推枕看東風幾人春夢中

袁凱

字景文松江人

蚊

羣蛇戢戢方鬪爭蝦蟆螻蛄相和鳴百足之蟲行無聲
毒氣着人昏不醒蚊蚋雖微亦縱橫隱然如雷吁可驚
東方日色苦未明老夫閉門不敢行

吳哲

字子愚華亭人號淡雲野人

題西省掾王繼善望雲圖時親居錢唐

掾郎思親仍好奇野服矯首天之涯白雲何處是親舍
吳越山橫雙黛眉當時釣游在親側縱逐風雲上京國
一為微名歸不得兄弟無人慰顏色漫把羹牆擬白雲
白雲聚散愁紛紜九江秋早祿田熟負米趨庭手自饋
過裏洋河

裏洋河何湯湯奔流百折到瀧岡砂礮灣灣里路長船

頭照見落日黃愁雲低沒雙鳬翔檣烏孤征心徬徨遙
空半作明月光涼風忽來吹我裳荻花夜白含清霜裏
洋河思故鄉

夜雪有懷范玉厓叔中朱滄洲孟辨

江南地薄雪併寒緣江矮屋茅復單折薪束緼空燎眼
春陽不暖先生槃西家利酤常苦酸東家壚頭量子寬
山公八斗焉足醉少須暫解雙眉攢門前柳花飛作團
瑤田珠樹森闌干鄒枚僵臥竟不起對此欲賦誰同懽

南州俊髦陸與韓躁進誤刷凌雲翰售才阮生急一官
肉眼不肯空曹瞞滄洲渺瀰玉厓嶺岼二仙者流同余
肺肝進直任公鉤退屑淮王丹宗儒倡道富文學妙幹
造化歸毫端迺謂仲尼顏子不死亦易事忍見後天日
月凋雙丸今夕復何夕三山皆白鸞我欲邀二仙授簡
發漫汗仙兮素愛我御風諒非難戒兒預沽客一石此
醉要吸六合萬頃冰壺乾

寄閩中兄子昭二首

日落咸池西迴光麗幽厓陽精有時下死草生春荇鳳
羽亦翔集鳴喙相和諧脩名在早晚君子慰中懷

有客扣我門手送閩中書我懷相感發憤樂在須臾征
途問生死加餐安起居樂只父母心富貴將何如


王逢

題曹煥章松筠軒

煥章號采芝生雲間人事親孝好博古雅善書畫過
其所居松筠軒時煥章謝病却掃意晏如也壬子夏

因哭母喪明作詩以贈

蒼髯之官直節君曹生落落日與羣丘園傲兀歲寒月
几簞颯沓陰涼雲天風冷然露清洒山人曾來坐其下
谷水秋高一鶴飛門前過盡黃塵馬



大雅集卷三

欽定四庫全書

集部

大雅集卷

四至六

詳校官中書_臣丁榮祚

助教_臣常循覆勘

總校官知縣_臣

楊懋珩

校對官助教_臣

卜維吉

謄錄監生_臣

張同履

欽定四庫全書

大雅集卷四

元 賴良 編

張以寧

字志道閩人

蛾眉亭

碧酒雙玉瓶獨酌蛾眉亭不見李太白但見三山青秋
色淮上來蕭然滿雲汀安得五十絃彈與蛟龍聽

孫華

字元實

夕陽

夕陽挂紅鼓強半浸綠水斯須日漸下堆阜參差起老
夫岸巾坐併入圖畫裏新新無停機擬議已非是人間
希闊事終有變滅理如何曠土懷眷眷不能已

倪瓚

字元鎮

送李徵士過荆谿訪王司丞

何處尋狂客故人王子猷花落庭前樹風吹溪上舟紫
筍生春雨綠蘋滿芳洲心隨酒船發悵望不能休

送李徵君還揚州

二月桃始華淮南客還家
階前疎雨落堂上春衣薄
為言沈約在吳中玉壺青
絲酒如空春風相過蕙草
綠芳菲滿堂樂未終

錢壁

字伯全華亭人

贈瑞雲林上人

英英谷口雲鬱鬱溪上林
形影偶相值去留復何心
握筆攬秋思倚窓延夕陰
誰云市朝遠亦足慰幽尋

鄭基

字本初三山人

擬梁簡文五七言體送鐵文彬左丞奉召還京

將軍功蓋世揚威淨海隅蛇矛縈後騎虎衛促前驅
三門開地甲八陣轉天衢饒鼓潮頭響竿旗日下趨飛梯
躡暗島合壁示宏圖降醜尋封奏帝庭璽書銜鳳落青
冥再召伏波歸闕下南荒銅柱已鐫銘駢駢返駟馬黃
河春始融輕風流碧塞晴日炫雕弓柳坼秦山麗冰銷
泗水通錦鷗窺長坂白雁墮春空黃封將法酒羽檄候

元戎麟閣圖形已預知
更應設帳會瑤池
夕斂花光歌吹歇
御帖重頒紀宴詩

李珪

字象賢寧海人

和友人過西郊韻

秋原晚蕭曠
杖藜荒逕微
川迴衆鷗集
天清孤鶴歸
寒烟蔓草密
積雨豆苗稀
臨流擬結構
息鞅振塵衣

釋萬金

字西白吳郡人

趙千里田家四季圖四首

桃花浪已深楊柳風猶弱鄰曲欣往來逢迎勸耕作犍
犢不自暇老農良有托共醉社日尊陶然得真樂

其二

蠶事方告成鳴蜩有新聲插秧雨初遍治草日不停雜
坐高樹陰解衣午風清作勞時自逸孰謂非常情

其三

湛湛露華白蕭蕭楓葉殷黃雲半已斂玉粒終不慳官
賦戒早輸農家期暫閑酒熟互招飲只在隣里間

其四

欣逢大有年，困積已稍豐。
滌場已十月，朋酒邀諸翁。
處處擊壤熙熙詠，幽風兒孫自生長。
樂與堯民同。

釋觀通

字希遠，宜興人。

壺中荷花

愛此荷花紅天然，匪雕飾披披妍。
令姿停停映清湜，風引茵蔯香露含。
珊瑚色，寘之白玉壺。
光輝滿瑤席。

周砥

字履道

吳越兩山亭

兩山夾江水孤亭橫翠微吳雲與越鳥千古不停飛
風屋洒松瀑月壑舞蘿衣王氣未消歇霸圖今是非
長歌一盃酒掃席延清暉

王逢

字元吉

題顏守仁竹石圖

廣丈窮益堅竹石研池出勢却虞人旌籟隱伶倫律渭
川春暗雨淇園寒落日鳳深蒼梧雲茅簷花復實

題俞東岡六有齋

隱居古善人中歲稅塵鞅座陳五經傳
楣揭六有榜儼若上帝臨於焉岱宗仰
昕瞻貴循度瞬息戒或罔賓師
臯比擁兒孫蚌珠朗將見一家學鄉術
春浹盜世方驚虛遠俗復競浮爽不圖
窺橫渠葦航排風上吁嗟清流
輩既悼八厨黨何階名教間浩然獨還
往月林函疎影溪嶼臻灝爽良覲匪後
遲朋酒置犧象

蘇大年

字昌齡廣陵人

題萱花圖為賴善庵賦

亭亭諼草花歲晚顏色好興言北堂陰樹之可怡老懷
歸歸未能游子悲遠道披圖歌白雲天末蜚鴻杳

曹睿

字新民永嘉人

贈顏守仁

吾友夢谷生其人美如玉平生鐵石心剛介不可辱寧
甘首陽貧寂寞在空谷懷哉能幾見高風激流俗

瑪魯

字兼善會稽人

述懷

流光何駸駸瞬息不我待憶從越山來忽復廿餘載羈
栖迫險艱形容為之改世澤嗟僅延生涯念何在冰霜
歲云暮憂端際滄海積陰韜日月矯首重興慨願效商
顏翁行歌紫芝採

葉杞

字南有京口人

感衷二十四韻

貢賦通重譯耕桑被九垓歛驚氛稷滿不謂歲時催丞

相與師出綸音降使開紫泥封五采黃道繞三台奕奕
宣光業桓桓李郭才陣雲連朔野廟畧定風埃香糯江
南餉蒲萄隴右醅馬群金匱帑毳帳雪毡毳劒動彭城
潰珠還甓社來長驅危破竹密令疾銜枚王者征無戰
羣雄勢欲摧忽聞君命召竟勒將旗回中夏捐雞肋清
朝隱鵠媒義聲從此逝銳氣一時灰天迴威弧弛城孤
畫角哀火狐翻嘯聚海鯉復喧呶歟附真遺患除封實
戲孩民情猶耿耿天討尚徘徊憂憤飛神爽瘡痍映淚

腮袞衣徒倚注肉食自興僿河漢明如洗昆侖豈易頽
孰矜黃鵠志羞上野鷹臺微効寧無念篇詩信漫裁霜
晴野空濶獨立望蓬萊

董佐才

字良用

題華亭朱孟辨篆冢詩卷

古初無毫楮義畫何由傳孰知文字理已具河圖前神
農洎蒼頡俯仰極人天穗書與鳥書創制分後先龜疇
錫禹時盤銘著湯年岐陽紀石鼓史籀稱獨賢矯若蛟

龍蟠鬱若鎖鈕聯科斗聿行漆形體因自然一從孔壁
廢重為經籍憐秦相約籀古撰次蒼頡篇小篆遂名家
勁健含姿妍登封及詛神金石紛雕鐫下逮隸八分變
化如雲烟漢經煨燼餘文教仍敷宣保氏存六書學僮
纔九千揚雄纂奇字杜林解探研繼踵非無人意氣莫
不全偉哉許祭酒蒐羅歸簡編墜緒賴復舉後學知相
沿陽冰克遠紹鉉錯造其玄近代邵與周筆勢回奔川
華亭朱茂才好古喜欲顛一掃世俗書習篆忘食眠秦

望并之罍碧落兼新泉小者案間列大者屋壁懸平生
囊橐貲多充買碑錢功深學既精齒壯志益堅池魚染
皆黑鐵硯磨將穿摹榻累萬番期差古人肩師法正在
茲什襲比蹄筌孫樵文自祭智永筆忍捐前脩不我欺
我癖尤難痊嵯峨細林山上與浮雲連譬彼汲冢書函
之瘞其巔聚土封若堂剝石表為阡其陽碧樹交其陰
書帶綠山靈謹呵護有名如有仙揮灑人間者顯晦名
非偏寶劔賈胡發玉押蔓草纏何如篆家光夜夜映星

躔

王逢

字元吉

沈一中清友為脩挾堂風露琴先寄是詩期過最

閒園夜宿

一日焦尾脫十年孤鳳喑欣遭運斤手妙得斲輪心溪
館茗烟薄石床蘿月深攜之肯枉顧側耳陽春音

淵明把菊圖為居生遵誼題

解官賦歸田把菊秋風前顧問劉寄奴何如傳延年

大雅集卷四

欽定四庫全書

大雅集卷五

元 賴良 編

孫華

字元寶號果育老人雲間人

至順改元季夏大雨幾月

雨欲沈三版天應隔萬重元年書大水六月變窮冬消
長關時宰艱危泣老農蛟龍毋太橫於爾卜豐凶

召命因赴省以母老夜至嘉禾驛二首

歲晚離家客更深上水船犬鳴營柝外漁唱驛燈前遠
役闕慈母孤忠仗老天極知朱紱貴無奈綠衣妍

漢使徵求急潘輿定省頻小人猶有母率土莫非臣歲
儉盤炊玉家貧酒泛銀自緣憂鶴髮豈敢逆龍鱗

張憲

字思廉號玉筍生會稽人

次評廷佐喜見寺樓韻

高樓名喜見遠客獨傷心鞍馬思劉備衣冠惜華歆曙
光浮海濶秋色到江深送目闌干久冥鴻入窅沈

黃璋

字仲珍華亭人

遣興二首

滿目烽烟在經春血淚垂素無投筆志空有掛冠思江
總真能仕陶潛托賦詩獨餘心炯炯靜夜月應知
牢落悲生計艱難嘆索居母兄皆寄食兒女久無書井
邑兵戈滿郊園瓦礫餘傷心春雨過農事定何如

徐孝基

字立本章安人

寧海道中早行

中歲事行役勞生卒未休大星垂野白遠水際天浮土
俗魚鹽富民居橘柚稠何年謝塵鞅歸臥此林丘

劉孺

字小齋江陰人

送朱自明調閩憲掾

昭代急才賢君今甫妙年閩中烏府客江上米家船美
化移蠻俗清風斂瘴烟好尋京兆老珍重玉堂仙

釋宗衍

字道原

吳江晚泊

風壤三州接江湖一水分虹消滄海雨日落洞庭雲客
意終難盡漁歌實飽聞長思陸魯望不出可忘君

秀州東郭舟中

自在眠沙鳥參差入郭舟山林吾計拙天地此身浮曉
氣成雲住晴波雜霧流攬衣疑厚薄十月暖如秋

釋元本

字立中

東許廷佐

近聞新出處水北古招提鵬鶚凌塵出驂騑顧主嘶失

弓還問楚抱瑟謾過齊道上將軍樹詩篇莫浪題

懷歸

憶昔兵戈際艱難艱省歸庭闈歡進酒弟姪戲牽衣
慈竹春陰合萱花夕露微即今懷父壠祭掃久相違

程煜

字彥明維揚人

過太湖

擊楫中流去西風客思催地吞南極盡波撼北冥迴蛟
館懸秋月龍宮起夜雷濯纓人不見長嘯倒金壘

楊基

字孟載蜀人

夏夜有懷二首

重露澄秋色輕風生夜涼
碧看湖草亂紅愛渚蓮香
有弟徒相憶何人不異鄉
悲笳在城上雙淚落衣裳

西月離東井黃雲近紫微
秦州今日亂漢使幾時歸
故舊皆朱紱風塵只素衣
流螢念孤寂相照入練幃

邵思文

字彥文

簡報國寺僧清遠

聞說招提境空王紫翠中法王新象馭天子舊龍宮愛
酒慙陶令能詩憶遠公欲尋方丈室相續晉賢風

浙江亭

極目錢唐上千山列畫屏雨晴江樹碧潮落海門青對
景悲王導移家憶管寧臨風一惆悵沽酒慰飄零

梁天祐

字祐之華亭人

乙未歲遣懷

四十今年是亂離生百憂身居南海上家在北山頭對

酒心先醉看花淚欲流時危賴支遁禪榻重淹留

董章

字士明四明人

輓穆爾古蘇

大夫寧制敵元帥豈容文白髮難忘母丹心只為君
虎狼千里戰吳越半江分落日孤城在忠良死後聞

次友人韻

唐室何多難詩愁杜拾遺皇天終厭亂聖德本無虧
自比當年事空懷故國悲一般思弟妹不在漢鍾離

許弼

字廷佐黃岩人

涼雨

大雲將晚滅涼雨忽西來
天地秋先到江湖客未回
思家空有淚憂國豈無才
萬里關山道誰憐庾信哀

魯淵

字道原曲阜人前進士

題馬文壁秋山圖為盧仲章賦

野館空山裏林泉象外幽
淡雲初霽雨紅葉早驚秋
路轉山藏屋橋危岸倚舟
直疑人境異便欲問丹丘

俞俊

字子俊

歎息

百年同轉燭五十始知非
老病侵腰膂浮雲苦馬
羈閑門羅可設今雨客
還稀空羨茅堂燕翩翩
傍母飛

沈欽

字欽叔

寄劉小齋

村迴落葉赤江空寒日
黃野鴉隨處宿官柳自
成行無路歸秦客逢人
問楚狂長歌一回首悽
惻向滄茫

張樞

得共辰弟詩次韻寄安慶建寧二弟

三弟一書歸經年萬事違舟移安慶雨雲作建寧衣老去知心少春還見面稀閒愁無著處開遍野薔薇

釋原靜

字天鏡雲間人

重九二首

舊日重陽節唯尋麴米春忽經時到眼但覺老隨人白髮雖多難黃花不厭貧登高本無意蹤跡愧紅塵

故舊俱淪喪，人情轉寂寥。
驅馳逢九日，牢落是今朝。
把菊難為醉，囊萸興自消。
江鄉獨無賴，風雨暗蕭蕭。

顧天祿

字謹中

次韻夜泊二首

海近潮初上，江清天倒流。
故鄉頻入夢，此地獨維舟。
落雁沈霜鏡，潛魚避月鉤。
不眠催早發，歷歷數更籌。

城郭還依舊，人民似昔非。
故鄉南去遠，奉使北來稀。
水落波聲小，天空月色微。
客舟隨處宿，浪跡幾時歸。

釋靜慧

字古明

寄梅雪朱隱居

何處風篁好漁莊路匪遙
水光清暑簟花影赤闌橋
客分詩卷鄰姬浣酒瓢
離懷無可贈春夢過蘭苕

顧彧

字孔文

客夜

露下碧梧白風生玉簫幽
關河今夜客天地十年秋
鼓角悲新鬼衣冠憶舊遊
都將周顗淚洒遍黑貂裘

賈閭

字兼善

和年弟聞人樞京城雜詩四首

鳳詔頒初罷花陰轉玉墀
鹽梅調鼎餽絲竹奏咸池
風靜爐烟直雲開扇影移
紫薇花下客爭賦奪袍詩

山勢北來遠河流東去長
天階羅虎拜帝室降龍祥
石鼓苔痕碧金盤露氣涼
慚無董賈策三伏獻明光

落魄南州士看花愧不先
未承金馬詔及見玉堂仙
日月開雙闕星河麗九天
何階近帝袞身惹御爐烟

霄漢樓臺湧春風燕雀飛櫻桃臣舊賜首肯馬新肥清
漏傳銀箭紅雲護袞衣窮經晚進士慚授一官歸

雪

朔風吹破屋曙雪下繽紛六合渾清氣千山盡白雲老
蛟深閉蟄獨雁遠呼羣想像西湖路梅花瘦幾分

春雨有感

曉雨連山白春雲壓地陰叢篁栖雀亂芳草落花深水
潤西江眼天長北關心孤桐開在壁忍操越南音

吳哲

字子愚華亭人號淡雲野人

寓上藍寺和銹公輔

遠俗依蘭若清心愛竹房
淨攜蒼玉珮高臥白雲鄉
近座天花密開函貝葉香
方庭涼月上隨意據胡牀

題盛本初居易齋卷

自分驅馳嬾那知踐履深
風雲難強會筭穎亦何心
屑屑齊門瑟悠悠梁父吟
周行信如砥吾道孰銷沈

葉杞

字南有號漪南

幽懷

季子長游日張翰早見幾秋
莼脩魚飯霜葉滿貂衣詭
遇遭時寵才猷與世違予
生傷往事甘老故山薇

陸燾

字子臨四明人

野晴

雁影鄉書外江聲客思中
野晴秋穫竟村遠晚炊同
松桂如違約文辭任嬾攻
瀟瀟吹鬢雪又見荻花風

大雅集卷五